

योना

ब्रेक्ब मुर: एको किताब सुम ब्रेक्शो बाक्बा, मेको आ पर्बम तेइ मब्रेक्शो बाक्ब। तन्न योना आ शेन्सीबपुकीमी योना आ ब्रेक्शा वोइश्शो रे एको किताब गुंडशो बाक्ब, दे मिन्नीम।

गेना ब्रेक्शो: इस्राएल डा पिप येरोबाम ८२५-७८४ बि. सी. आ पालाम योना बाक्त। २राजा १४:२५ मेना आमोस नु होसेमी यो परमप्रभु यावे आ लोव्र पशो बाक्ताक्स। एको किताब योना बेक्म नोले ब्रेक्शो बाक्ब।

मार ब्रेक्शो: परमप्रभु यावेमी इस्राएली मदुम्शो, अर्को रागी डा मुर आन कली इस्राएली आन कली खोदेंशो पा दाक्ब। येसुमी यो योना आ सांकछी गेब। मत्ती १२:३८-४१; लूका ११:२९-३२

परमप्रभुमी योना कली सोइश्शो

1 परमप्रभु यावेमी अमीत्तै आ तौ योना कली मार लोव्र पवा बाक्त देंशा हना, २राजा १४:२५

2 “गे छुल बोक्शा, निनवे माइश्शो ठेयब सहरम लावो। मिनु मेकेर डा मुर आन मरिम्शो पशो आ पर्बम शेन्दीमी। मारदे हना गो मेको आन मरिम्शो पशो नेल्ल ताता” दे मदा बाक्त।

योना परमप्रभु रे प्रोक्शो

3 तन्न योना परमप्रभु यावे आ डोंइती रे लशा, निनवे मलथु, टारशीश गे प्रोक्चा गोवा बाक्त। मिनु योप्पा सहरम यिशा, टारशीश लाइब डोंगा का थिश्शा, क्येट थाप्शा, परमप्रभु यावे आ डोंइती रे प्रोक्शा, डोंगाम डोंइसे बाक्त। भजन संग्रह १३९:७,९,१०

4 मिनु परमप्रभु यावेमी समुन्द्रमी ठेयब फश पपदा बाक्त। मोपा ठेयब फश गिवारम पतीके मेको डोंगा जिक्चा चिक्ता बाक्त।

5 मिनु डोंगाम गेय पाइबपुकी हिंशा, आन देवी देवता आन नें थिशा, ब्रेम्मा बाक्त। मिनु डोंगा सोपी पचा कली मेको आन बाक्शो मारेइ मारेइ समुन्द्रमी ताइक्तमे बाक्त। योना चहिं डोंगा आ आइदी तला लशा, इप्शो बाक्माक्त।

6 मिनु डोंगा चलेबमी योना आ इप्तीकेम लशा “गिश डा इमे। बोक्को, इ परमप्रभु कली थोवो। मेको परमप्रभु इं कली खतम दुम्या रे प्रोंइबा, कों” देंमाक्त।

7 मिनु डोंगाम गेय पाइबपुकीमी “सुम पतीके ओदेंब श्येत दुम्माइ, तुइक्चा कली चिडगा कोव्रचा” देंमुशा, चिडगा कोव्रडमे बाक्त। चिडगा कोव्रडमेनु, योना आ नेंम गूमाक्त। हितोपदेस १६:३३

8 मिनु डोंगाम गेय पाइबपुकीमी योना कली “गो मारदे ओदेंब श्येत जया? इ गेय मार में? गे ते रे पिवे? तेको रागी डा नवे? मार थर डा मुर नवे?” दे हिल्लो पामे बाक्त।

9 मिनु योनामी “गो हिल्लू नड। रागी नु समुन्द्र सेल्ब, सरीड डा परमप्रभु यावे कली थमा सुइक्ब नड” देंमाक्त। उत्पती १:९-१०

10 मिनु मेको मुरपुकी डोंइती क्येडा हिंशा योना कली “गे मारदे ओपा प्रोक्डे?” दे हिल्लो पामे बाक्त। मारदे हना योनामी मेको आन कली “गो परमप्रभु यावे आ डोंइती रे प्रोक्ती” देंशो बाक्माक्त।

11 मिनु मेकोपुकीमी योना कली “फश गिवार नाइक्पाइक्चा कली मार पचा माल्नीकी?” दे हिल्लो पामे बाक्त। मारदे हना फश गिवार पतीके ब्वाक्कु बारना बारन लमाक्त।

12 मिनु योनामी “आं कली समुन्द्रमी ताइक्ताक्यीनी हना, फश गिवार नाइक्ब। एको फश गिवार आं पतीके पशो बाक्ब, दे गो तुइक्नुड” देंमाक्त।

13 मिनु मेको मुरपुकीमी लेंशा डोंगा रागीम चाक्चा कली शुश खीयेमे बाक्त। तन्न मचाप्मे बाक्त। मारदे हना फश गिवार शुश बारशो बाक्माक्त।

14 मिनु मेकोपुकीमी परमप्रभु यावे कली “परमप्रभु यावे, एको मुर आ पर्बम गोपुकी बेक्चा ममाल्कल। एको मुर आ दोस मतकल।

मारदे हना परमप्रभु यावे, इन दाक्शो यो मोदेशोन बाक्त” देमा बाक्त।

15 मिनु योना कली समुन्द्रमी ताइक्तमे बाक्त। मिनु फश गिवार नु ब्वाक्कु खा दिम्शा, नाइसे बाक्त।

16 मिनु मेको मुरपुकी परमप्रभु यावे कली मान पा हिंशा, मेको कली चढेशा “आ देशो नेल्ल टीनीकी” दे परमप्रभु यावे कली कसम जामे बाक्त।

17 मिनु परमप्रभु यावेमी योना कली दाक्पाइक्चा कली ठेयब डांइ का सोइक्ता बाक्त। मेको डांइमी योना कली गु दाक्गानु, योना सां नाक्दो नाक्ती आ कोव्रजीम बाक्माक्त। मत्ती १२:४०; मत्ती १६:४

2

योनाम परमप्रभु कली लोव्र पशो

1 मिनु योनामी डांइ आ कोव्रज रे पा परमप्रभु यावे कली लोव्र पवा बाक्त।

2 मिनु मेकोमी परमप्रभु यावे, आ परमप्रभु कली “गो आं श्येत जतीके रे लोव्र पाता। मिनु आं कली लोव्र लेत्ताक्यीनी। गो बेक्शो मुर आन बाक्तीके रे ब्रेत्ती। मिनु गे आं सेंदा नेंतीनी। भजन संग्रह १२०:१

3 गे आं कली समुन्द्र आगाम ताइक्ताक्यीनी। आं एर ओंथ ब्वाक्कु ला बाक्शो बाक्त। ब्वाक्कुमी आं कली गिल्शा, आ छाल आं तारी रे लाम्तेक्म। भजन संग्रह ४२:८

4 गोमी ‘इन क्येडा डोन दुम्शा, इन योव्रशो खिं मुल गेनायो मताइनुड’ दे मिम्ताक्ड। भजन संग्रह ३१:२२

5 आं एर ओंथ ब्वाक्कु बाक्तीके, हेरा बेक्ती। गो ब्वाक्कु आगाम बाक्डानु, आं पिया लेउम सुम्शो बाक्त। भजन संग्रह १८:५; भजन संग्रह ६९:२

6 मिनु गो समुन्द्र आगा क्येडा यो लुकच गुम्ती। गो गेनायो मगूचा डा पा गुम्ती। तन्न परमप्रभु यावे, आं परमप्रभु गे आं कली बेक्चा रे प्रोइतीनी। भजन संग्रह १०३:४

7 आं थुं लुकच लशा, गो परमप्रभु यावे, इन कली मिम्शा, इन कली लोव्र पाता। मिनु इन बाक्तीके रे आं लोव्र नेंतीनी। भजन संग्रह १४२:२-४

8 जाम्शा लाइब मूर्ति कली थमा सुइक्बपुकीमी इन शिशी मताइनीम। भजन संग्रह ३१:७

9 गो चहिं 'गे रिम्शो पाइब बाक्नीनी' देंशा, इन कली ठेयब सेल्लुड। गो इन कली देंशो लोव्र खाप्नुड। परमप्रभु यावे, गे मुर आन कली श्येत रे प्रोंइब बाक्नीनी" दे लोव्र पवा बाक्त। भजन संग्रह ५०:१४; भजन संग्रह ११६:१७-१८

10 मिनु परमप्रभु यावेमी डांइ कली "योना कली ब्वाक्कु रे ग्रुंइशा रागीम तेवो" दे अरेवा बाक्त। मिनु डांइमी मेको कली ब्वाक्कु रे ग्रुंइशा, रागीमी तेवा बाक्त।

3

लेंशा योना कली शेंथ सोइश्शो

1 मिनु परमप्रभु यावेमी लेंशा योना कली लोव्र पवा बाक्त। योना १:२

2 मिनु मेकोमी "गे बोक्को, निनवे माइश्शो ठेयब सहर लावो। गो इ कली मार शेंनुडा, मेको मेकेर डा मुर आन कली शेंदीमी" दे मदा बाक्त।

3 मिनु परमप्रभु यावे आ लोव्र टिशा, योना निनवे गे लचा गोवा बाक्त। निनवे थम ठेयब सहर बाक्माक्त। मेको निनवे सहर सुर का रे अर्को सुर जाक्दीत्चा कली नाक्त सां माल्बाक्माक्त। योना ४:११

4 मिनु योनामी निनवे सहर ओव्रशा, नाक्त का गाक्शा, मुर आन कली "४० नाक्त नोले एको सहर खतम दुम्ब" दे ठेयब सेंदामी शेंदा बाक्त।

5 मिनु मेको नेंशा निनवे डा मुरपुकीमी परमप्रभु आ लोव्र थमा बाक्ब, दे थमा सुदमे बाक्त। मेकोपुकीमी "निनवे सहर डा आइक्च नु ठेयब मुर आन मरिम्शो पतीके रे लेत्तेक्म, दे कोंइचा

कली नेल्ल माइजा बाक्शा, अरन्डी फेक्सीन” दे नेल्ल आन कली नेंपदमे बाक्त। मत्ती १२:४१; योएल १:१४

6 मिनु निनवे डा पिपमी यो मेको लोव्र नेना बाक्त। मेको आ ठेयब नित्तीके रे बोक्शा, पिप आ फेक्तीके वा प्रुइश्शा, अरन्डी फेक्शा, पुलु तारी निस्से बाक्त।

7 मिनु पिप नु आ मुरपुकीमी निनवे डा मुर आन कली “मुरपुकी नु बस्तु भावमी मारेइ मजामेक्ल, मतूडमेक्ल। बी ब्यफ, क्यारश भेडा आन कली यो मयोव्रडमेक्ल, ब्वाक्कु मतुंडमेक्ल।

8 मुरपुकीम अरन्डी सुम्सीशा, बी ब्यफ, क्यारश भेडा यो सुम्चा माल्नीम। मिनु मेकोपुकीमी परमप्रभु कली ठेयब सेंदाम पुंइचा माल्नीम। मिनु नेल्ल आन मरिम्शो लां नु आन मरिम्शो पशो रे लेत्चा माल्नीम।

9 परमप्रभु आ शुश गाइक्तीक रे लेप्बा, कों? मेकोमी आंइ कली मसाइक्बा, कों? सुम तुइक्बा, डा?” देंमा बाक्त। योएल २:१४

10 मिनु परमप्रभुमी मेको मुर आन पशो नु आन मरिम्शो लां रे लेशो तशा “आं डोंइती पाइनुड देंशो, मुल मपाइनुड” दे मिम्ता बाक्त। मिनु परमप्रभुमी आ डोंइती मिम्शो मपवा बाक्त। येरमीया १८:७-८

4

योना परमप्रभु नु गाइश्शो

1 मिनु परमप्रभुमी मुर आन कली खतम मपशो तशा, योना चुरशा, शुश गाइक्ता बाक्त। मिनु परमप्रभु यावे कली

2 “परमप्रभु यावे, आं रागीम बाक्डानु, गो एको तुइश्शो नड। मोपतीके गो टारशीश गे प्रोक्शो नड। गे नेल्ल कली शिशी पाइब नु दाक्ब परमप्रभु ननी। इन गाइक्चा रीब पा मबोक्ब। इन शिशी ठेयब बाक्ब। इन थुं श्येत गेचा बाक्त हना यो, इन थुं लेशशा, मेको आन कली मारेइ मपाइनीनी, दे गो तुइश्शो नड। प्रस्थान ३४:६

3 मुल परमप्रभु यावे, आं कली साइय्यीनी। मारदे हना गो ब्रोंइचा क्येडा बेक्चा दाक्नुड” दे परमप्रभु यावे नु लोत्र पवा बाक्त। १राजा १९:४

4 मिनु परमप्रभु यावेमी “इ गाइशो ठीक ममाइ” दे मदा बाक्त।

5 मिनु योना सहर रे लशा, पूर्ब गे डा डांडामी निस्से बाक्त। मेकेर गोठ का सेल्शा बाक्शो बाक्माक्त। मेकेर फाम्सीशा निशशा “मेको सहरमी मार दुम्बा” दे कोत्रशा, रिम्दा बाक्त।

6 मिनु परमप्रभु, परमप्रभु यावेमी योना कली नां फाम्सीशा बाक्ल, श्येत मजवल, दे छक लाक्चा डा पा आइक्च रवा का आ बाक्तीकेमी वापदा बाक्त। मिनु योना मेको रवा तशा, शुश ग्येरसे बाक्त।

7 तन्न आ दीसा सुनी कना परमप्रभुमी खोंकला का सोइक्ता बाक्त। मेकोमी मेको आइक्च रवा आ शाक्श खोदा बाक्त। मिनु रवा सोल बेक्माक्त।

8 मिनु नां दाम्मेनु, परमप्रभुमी योना आ बाक्तीकेम पूर्ब रे होश फश सोइक्ता बाक्त। मिनु नांमी योना आ पिया नाप्शा, योना ओले पेटे दुम्शा, गोल्माक्त। मिनु योनामी “ब्रोंइचा क्येडा बेक्चा दाक्नुड” देंमाक्त।

परमप्रभु आ शिशी

9 मिनु परमप्रभुमी योना कली “गे मेको रवा आ पर्बम गाइक्चा, ठीक दुम्बा डा?” दे लोत्र पवानु, मेकोमी “गो मबेक्डा सम्म गाइक्नुड” दे लोत्र लेत्ता बाक्त।

10 मिनु परमप्रभु यावेमी “गे इ मखुम्शो, मकोल्पाइशो, नाक्दो कामी वाशा, आ दीसा नाक्दो सोल बेक्शो रवा कली शिशी पाइनेवे।

11 मिनु गो मेको ठेयब सहर निनवे आ पर्बम शिशी मपाइनुडा डा? मेकेर आन ग्युरा पेरा गुइ मतुइक्ब लाख का २० हजार क्येडा शुश मुर नु बी ब्यफ, क्यारश भेडा यो बाक्नीमी। गो मेको आन कली शिशी पाइनुड” देंमाक्त।

परमप्रभु यावे आ लोत्र

Bible in Sunwar (NP:suz:Sunwar)

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

The Bible without Deuterocanon

in Sunwar

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

27cd6a1c-0244-5add-a4e8-b4f0e5104473